

ZAMBAK

List učenika Osnovne škole „Mehmed-beg Kapetanović Ljubušak“

Godina XXIII Broj 41 Maj/Svibanj 2019.godina



Imad Smajlović IX-1

Redakcija:

Barić Đuzela, Buljubašić Ayman, Fočo Ayman, Hasanović Vedad, Osmanbegović Azra, Bajrović Nejra, Korman Lejla, Baručić Ena, Selimović Ena, Skopljak Nejla, Kasapović Nejla, Adilović Lamija, Bibić Elma, Tihic Nedim, Dalipagić Sulejman, Rustemović Ema, Omerkić Nahla, Baždar Enida, Fejzić Ajla, Alilović Semija, Alilović Semiha, Huremović Lejla, Babajić Lukman, Huseinović Muhamed, Smailagić Naila, Bećarević Tarik, Rešidović Armela, Barić Lejla, Sultanović Zara, Fejzić Ammar, Babačić Ilma, Babačić Lejla, Biogradlić Zara


Uređuju učenici s Behdijom Mustafić, nastavnicom Bosanskog jezika i književnosti, Hrvatskog jezika i književnosti, Srpskog jezika i književnosti i Sabinom Efendić, profesoricom razredne nastave.

Pratite nas i na našoj web stranici:

www.osmbklj.edu.ba te na Facebook stranici škole

IZ SADRŽAJA:

- Posjete
- Takmičenja
- Projekti
- Literarni radovi
- Likovni radovi
- Zanimljivosti
- Humor



1. mart-Dan nezavisnosti BiH



Podsjećanjem na značajne ličnosti naše domovine, te uspomenama iz prošlosti, obilježili smo 1. mart- Dan nezavisnosti BiH. Kao i svih ovih godina, naša zanimljiva priredba, oduševila je sve prisutne: goste, uposlenike, roditelje i učenike.

Igrama iz okoline Sarajeva, najmlađi učenici, članovi Folklorne sekcije pobrali su najviše simpatija. Zapaženi su bili i članovi Dramske sekcije, Malog i Velikog hora, naši recitatori, Ritmička sekcija a na visini zadatka bila su i naša dva voditeljska para, učenici nižih i viših razreda. Najljepša čestitka za domovinu, Bosnu i Hercegovinu.



Tradicionalna priznanja

Članovi sekcije Očuvanje kulturne baštine i nastavnica Lejla Aličić, kao i direktor škole Edin Smajić, povodom Dana nezavisnosti, dobili su priznanja za učešće u interaktivnim radionicama u organizaciji Muzeja Alija Izetbegović. Za nas, to je već postala tradicija i ponosni smo što uvijek imamo lijepih likovnih radova na temu naše lijepe i jedine nam domovine. Ove godine bilo je čak pet učenika koji su dobili priznanje : Ena Selimović i Nejla Kasapović IX-2, Hatidža Hasanović i Žilić Fatima VIII-2, i Farah Rašidović VI-2.

Mostovi

Povodom obilježavanja Dana nezavisnosti, učenici VIII razreda sa nastavnicom Lejla Aličić prisustvovali su manifestaciji "Ko sagradi most, dva će mjesta sastaviti, ko ga poruši - oba će izgubiti", u organizaciji Udruženja nastavnika i profesora historije Kantona Sarajevo.



Obilasci

U okviru svojih aktivnosti, članovi sekcije Očuvanje kulturne baštine u korelaciji sa



Društvo/Kultura/Religija, posjetili su vjerske objekte u gradu:



Katedralu, Begovu džamiju, Jevrejski muzej, Staru pravoslavnu crkvu. Posjetu realizovale nastavnice Lukač Mirsada i Lejla Aličić i učenici V-IX razreda.

Balet

Učenici osmih razreda imali su priliku pogledati baletno izvođenje čuvenog "Don Kihota" u Narodnom pozorištu. U pratnji nastavnica Lukač Mirsade i Aličić Lejle, uživali su u ovom veličanstvenom baletu.

U Olimpijskom muzeju

Učenici prvih razreda imali su i svoju prvu posjetu. Naime, sa učiteljicama Kadić Belmom i Babić Ajlom posjetili su Olimpijski muzej i upoznali se sa ovim važnim historijskim događajem za naš grad iz 1984. godine.

Škola u prirodi – Šabići, Škola plivanja, Škola skijanja



Mnogo je događaja, obilazaka ali i edukativno korisnih projekata. Tako su učenici četvrtih razreda boravili u školi u prirodi u Šabićima, sankali se i učili sa svojim učiteljima. Također su završili i školu plivanja, dok su učenici šestih razreda uspješno završili školu skijanja na Igmanu.



Terenska nastava

Brižljivim planiranjem učitelja četvrtih razreda realizovana je i terenska nastava na dvije različite lokacije. Za pedeset učenika naše škole ovo je bilo izuzetno vrijedno i korisno iskustvo, a znanje kojim su obogaćeni u Botaničkom vrtu te na Poljoprivrednom dobru, sigurno će biti trajna kategorija za svakog od njih.



Tunel spasa

Učenici devetih razreda posjetili su Tunel spasa u pratnji razrednika, Kazija Jasmine i Zeković Mirze. Tom prilikom učenicima je prikazan dokumentarni film o tunelu, pogledali su muzejsku postavku i prisustvovali su času historije o temi ratnih dešavanja iz perioda '92-'95. „Ovim projektom se žele podsjetiti učenici da nikad ne trebaju zaboraviti šta se ovdje dešavalo i žrtve koje su pale. Nekadašnji najvažniji objekat izgrađen tokom opsade Sarajeva, danas predstavlja atrakciju za hiljade turista iz cijelog svijeta koji svakodnevno posjećuju ovo mjesto, ali nikad ne zaboravite cijenu koja je data da bismo mi ovdje bili“, istakli su prisutni govornici.

Ekskurzija za devete razrede

Ekskurzija za učenike devetih razreda organizovana je u Blagaju. Ipak, učenici su sa svojim razrednicima imali priliku obići brojna druga mjesta, vrijedna posjete, poput fabrike "Ledo",

Etno selo "Herceg", vodopada Kravice, te Dubrovnik, Stolac i Hutovo Blato, i naravno Vrelo Bune.



Dan škole

Svečanom priredbom i humanitarnim bazarom obilježili smo Dan naše škole. Zanimljive pjesme, ples, a zatim mnogobrojne nagrade, obilježili su ovogodišnji Dan škole. Ove školske godine bili smo jako zapaženi na takmičenjima na svim nivoima, tako da su najuspješniji među uspješnima, dobili zaslužene zahvalnice i priznanja. Čestitke svim takmičarima i njihovim nastavnicima!



LITERARNI

8.mart

Osmi mart je
radostan dan,
Naše ga mame
vole i slave,
Djeca svojoj
mami daruju
poklone,
Šarene i vesele.

Mame se poklonima raduju
Koje im djeca daruju.
Mame kad poklone otvore
Srca im se rastope.

Azra Osmanbegović, III-2



KUTAK

Majka

Majka nam je
sreću dala
I zato joj hvala.
Daju nam lijepe
darove,
Ono što one
zarade.


Zato su uvijek radosne
I na djecu ponosne.

Ena Baručić, Nejra Bajrović, Lejla Korman,
IV-2

8.mart


Osmi mart je dan žena,
Pun radosti i veselja.
Kad mami dam ružu
To njoj grije dušu.
Poklon u školi pravim
Da svoju mamu iznenadim.
Na taj dan sve je posebno
Lijepo, sretno i ispunjeno,
Mame su tada najljepše
I srećom srca ispune.

Ayman Buljubašić i Ayman Fočo, III-2



Aprilska duša

To je dan šale i radosti male.
Kada se šališ sa prijateljima i sa roditeljima.
Ako se sa ljudima šališ,
I smicalice praviš,
Ti reci aprililili
I dobro promisli.
Nejra Bajrović i Lejla Korman, IV-2



Proljeće

Kada zima prođe
Znamo da će
Proljeće da dođe.

Svaki dan cvijeće
Sve ljepše i ljepše
A nana pravi kolače
Sve bolje i mekše.

Grana se sa svojim
Lišćem obuće
A topli zrak ulazi
U naše kuće...

Tarik Bećarević V-2

Dan žena

Osmi mart je dan žena
Kad im kupujemo poklone nije bitna cijena.

Taj dan, kupuju se ruže,
I tad se svi družu.

Sve se od ruža crveni,
To je radost i meni.

I nešto malo, sitno,
Nekoj ženi može biti bitno.

Poslije osmog marta proljeće se sprema,
I cvijeće miriše od svog parfema.

Ptice se u grad vraćaju,
I u njega radost svraćaju.

Ilma Babačić i Naila Smailagić V-2

Proljeće


Prošli su ljetu, jesen i zima,
A sada je proljeće došlo svima.

Lišće prima zelenu boju,
a medvjed napušta pećinu svoju.

Dolazi nam ljepše vrijeme,
a nane u baštu sade novo sjeme.

Vjesnici proljeća puštaju klice,
A nama topli zrak puše u lice.

Naila Smailagić V-2



Ljepotica ptica

Jedva čekam da dođu laste,
Da u nama radost poraste.
Da vidim slobodni let
Malih ptica pet.

Da mi ptić na prozor dođe,
Kada ga počastim na slobodni let da pođe.
Samo da ga na nebu vidim
Bez lovca pred njim.

Tarik Fejzić, Ensar Kovač, Vedad Zuhrić, IV-2

Lastavice

Lastavice su male ptice,
I ne vole kišne kapljice.
One idu na jug
I to je njima dalek put.
Te ptice su jako slatke,
I njihove noge su kratke.
One prave gnijezdo ispod strehe,
A kad ga vide, svi stave osmijehe.

Ayman Buljubašić, Ayman Fočo, Vedad Hasanović, III-2

Rijad Muhović, VII-2



Maj

Maju mjesecu svi se raduju,
I sreću jedni drugima daruju.

On dolazi baš sada sa suncem,
Da nam ugrije tijelo,
Da probudi cvijeće veselo,
Da donese srce radosno.
Veselju nikad kraja
Zbog mjeseca maja.

Azra Osmanbegović, III-2



Nahla Omerkić, VII-1

Hana Omerović, V-1



Moj djed

Kada pogledam lice svog djeda, prvo što vidim su krupne zelene oči koje su pune ljubavi. Lice mu je ozareno i oivičeno borama koje pričaju svoje priče zasebno. Iako je stariji čovjek, njegovoj snazi i volji za životom mogu zavidjeti i puno mlađi ljudi. Moj dedo se zove Džemal i on me jako voli. On je uvijek tu za mene kad god mi zatreba. Njegova dobrota nema granica. Jednom prilikom kada sam slavio 6. rođendan, on je došao čak iz druge zemlje da ga proslavimo zajedno. Tada sam vidio koliko me on zapravo voli. Moj dedo je poseban jer voli ljude i voli život. Njegove izborne ruke pokazuju godine, ali njegov duh je još uvijek mlad. On me podržava u svemu i zato ga volim toliko puno, a najviše volimo gledati utakmice zajedno.

Zeničanin Zlatan VII-1

Ljetovanje

Moj najljepši doživljaj je putovanje u Crnu Goru. Bila sam u mjestu Ulcinj. Išla sam sa svojim roditeljima, bratom i tetkom. Putovali smo dugo...Uživali smo posmatrajući planinske predjele. Prolazili smo kroz tunele, lijepe krajolike. Kada smo se odmorili, otišla sam na plažu i posmatrala more. Velike talasaste površine vode, plavičasto nebo. Sve to obasjavaju topli sunčevi zraci. Dani su prolazili kupali smo se, sunčali i šetali. Turisti iz raznih zemalja su uživali u toj ljepoti. Brat i ja smo se prskali u vodi, pravili dvorac od pijeska. Poslije bih ja sjela i posmatrala brodove i jahte. Maštala sam o dalekim, morskim putovanjima. Kada smo krenuli kući, stali smo da kupimo suvenire. Bilo je lijepo i rado se sjećam tog doživljaja.

Karić Sumeja VI-2



Nezaboravno putovanje

Kada sam bila mlađa, bojala sam se putovanja bez roditelja.

U petom razredu smo trebali ići u Blagaj. Odlučila sam da i ja idem te sam se prijavila. Došao je i taj dan. Krenuli smo rano. Vožnja je bila ugodna jer sam se zabavljala s drugaricom koja je sjedila pored mene. Kada smo stigli, brzo smo zauzeli sobe i krenuli na ručak. Bili smo gladni i sve smo pojeli. Moje prijateljice i ja smo uživale u igri i zabavi. Obilazili smo historijska mjesta, lijepu prirodu. Mnogo smo naučili o historiji, mjestu, znamenitostima Mostara. Obilazak tih mjesta je bio poučan. Bili smo jako umorni pa smo brzo zaspali.

Kući sam se vratila sa mnogo lijepih uspomena i priča koje sam podijelila sa roditeljima. Bila sam ponosna jer sam pobijedila svoj strah. To putovanje neću nikada zaboraviti.

Halilović Sara VI-1

Emina Gičević, IX-1



Moj uzor

Moj uzor je moja mama, moj najbolji prijatelj. Ima lijepu kratku kosu. Oči su joj kao plavo drago kamenje, a usne kao ruža. Voli nositi i nakit koji upotpunjuje njenu lijepu odjeću. Ona je topla, draga, nesebična. Od mladosti do današnjeg dana je provela svoj život bez majke,

ali je ostala snažna i uporna. Skoro sve svoje slobodno vrijeme provodi sa mnom i mojim bratom. Rano ustaje da sve pripremi kako bi išla na posao. Sve stiže uraditi da bismo imali dobar i ugodan život. Često kuha ukusna jela. Njeno najveće bogatstvo je porodica.

Takva je moja mama, meni najdraža i najljepša.

Eldin Bulja VI-1

Moja Bosna

I kad se mi u Bosni sjećanjem,
U teške godine vratimo,
Na te bolne, ratne dane se prisjetimo
Heroje naše nikad ne zaboravimo!

Našu Bosnu, domovinu ponosnu
Znanjem ćemo u slobodi braniti
I od nesreće je sačuvati
I Bosna će naša vječno postojati.

Nezavisna je naša Bosna, slobodna
Našom domovinom se ponosimo
U mislima i srcima našim
Vječno, vječno je nosimo!

Armela Rešidović V-2

Moja domovina BiH

Moja domovina je puna planina
Sa malo ravnina,
Puna brižnih ljudi
S puno prirodnih čudi

Ljudi su se za nju borili
A na kraju se izborili,
Ljiljan je naš bio simbol
A nekima u srcu ostala bol.

Mi smo Olimpijski plamen zapalili
A mnogi su medalje osvajali,
Tu zimu je Sarajevo gladao čitav svijet
I ono je u svijetu bilo kao divan cvijet.

Tarik Bećarević i Lejla Babačić V-2



Selma Šečić, VIII-1

Naša domovina

Domovina ne znači samo zastava i grb,
Domovina je mjesto neopisivo,
Mjesto koje ljudi vole i u kojem žive.
Na kojem su uvijek sretni.
Na kojem vole biti,
Zato je domovina važna
Zato mi volimo Bosnu.

Naila Smailagić, V-2

**Zdravo, brigado naša slavna, 105.
motorizovana**

Zdravo, brigado naša slavna, ko djevojka
divna, bajna
sa 26 godina i ko mudrac od sto ljeta,
postroji se,
i sjeti se;

I šuma se stidjela što se iz nje na grad puca,
iz tenkova, haubica,
zlo i čemer u mecima, granatama,
ljudsko zlo u nakanama!

I šuma se stidjela!

Dugo su promišljali i svako zlo smišljali
kako da nas unište, a ti si se postrojila
i već vojsku oformila.

Nije bilo uniformi, samo civilna odijela,
Samo srce u junaka, duksevi i tene
i krv bosanska kroz vene!

A oni su razarali, ubijali, nikada im ne bi
dosta,
dok, ti, Slavna, sa svim sinovima Bosne,
i majkama i sestrama, uz obroke male,
posne,
ne ustade kao vulkan
i otjera krvoloke.

Zdravo, brigado naša slavna,

postroji se,
prisjeti se:
„Neće proći! Neće u grad ući!“ –
to rekoste, odlučno i hrabro.
Obećaste, vi bosanski sinovi,
i s ljubavlju za sve majke,
za sve sestre,
za svu djecu
i za pretke
stadoste pred metke.

Ispuniste zavjet svoj, postojanje
i amanet svojih očeva
i majčica svojih dragih,
koje su ovdje oduvijek bile
i šehidske i herojske majke,
tužne ličnosti iz bajki,
a opet su sinove rađale.

Otjeraste divlje zvijeri,
otjeraste pridošlice
i iz drugih naših gora
da ne bude noćnih mora,
da mi život proživimo
i tvojim borcima se divimo.

Sad slavimo domovinu,
svaki kamen zemlje Bosne,
i Armiju ove zemlje ponosne,
tebe, naša Slavna,
105. motorizovana.

Enida Baždar, VII -1

Danin Karaičić, I-2



Zanimljivosti

Konji: njihove noge su toliko jake da mogu ostati u stojećem položaju čak i kada uginu.

Mušjaci pingvina poklanjaju svojim ženjkama najljepše kamenčiće kao znak svoje ljubavi.

Čokolada se nekad koristila kao sredstvo plaćanja.

Male lisice su teška svega 100 grama, slijepo su, gluhe i ne mogu da hodaju. U ovom slučaju mama ostaje sa njima dok tata ide u lov i donosi hranu.

Zrele brusnice mogu da odskoču poput gumениh loptica.

Puž može spavati 3 godine odjednom!

Mlijeko nilskog konja je ružičasto.

Kada prislonite školjku uz svoje uho, ne čujete ocean već svoju krv.

Vruća voda se brže zaledi od hladne.



Nahla Omerkić VII-1



Zagonetke

1.Sladak sam kao šećer
Hladan sam kao led.
Ako me na toplo staviš ,
Više nisam _____

2.Malen sam,nisam velik,
Ni previše snažan
Ali svoju kuću nosim
I pravim se važan!

3.Niti jurim,niti žurim,
Uvijek sporo idem,
Ali tačno na vrijeme
Uvijek na cilj stignem.

4.Svakog dana stotine nogu
Pregazi moja rebra
A ja i dalje stojim
Jer sam _____



Ema Rustemović VII-1

Odgovori:1-Sladoled,2-Puž,3-Kornjača,4-Zebra



NAŠI MATURANTI



IX-1 s razrednikom Mirzom Zekovićem



IX-2 s razrednicom Jasminom Kazijom